

TUTÚ CÚÚ ÒÚ NÍ CADÚHA TÉ PĀBLÚ QUIHIⁿ NDAHA TÉ TIMÙTEÚ

Té Pāblú cādūha-dé tutú quíhíⁿ ndaha té Timùteú

¹ Yúhú té Pāblú ní tendaha ñaha Yá Ndiõxí cāháⁿ-í tnúhu Xítóhó Jesucristú núú ñayiu, chí ducaⁿ ní cachí Yá Ndiõxí cunduu. Te cāháⁿ-í dàtná ní cachí Yá Ndiõxí sá ncháá nchòo ñayiu ndècu ndihí Xítóhó Jesucristú naníhí tǎhú-ó. ² Te yúhú té Pāblú cādūha-í tutú-a daquixi-í ndaha yòhó té Timùteú chí ío cùu iní ñáhà-í xii-n, te diu-í ní sanu ichi ñaha-í xii-n ìchi Xítóhó Jesucristú, te xicáⁿ tǎhù-í núú Dütú Ndiõxí ndihí núú Xítóhó Jesucristú sá ïo na chindee chitúu ñaha-gǎ xii-n, te cundáhú iní ñáhá-gǎ, te ducaⁿ ndì nduú-gá ná cádá te ío váha cuu iní-n cùndecu-n.

Cáháⁿ váha-o cuèndá Xítóhó Jesucristú

³ Te cuèi nduu cuèi niú ducaⁿ-ni cāháⁿ ndihí-í Yá Ndiõxí cuèndá-n, te ndàcáⁿ tǎhù-í núú-gǎ, te xínu cuechi-í núú-gǎ dàtná ní quide cue ñaní tnáhà-í ní xíndecu ndéé sanduu, te cùtnuní iní-í sá quidé ndáá-í núú-gǎ dàtná ní xóo cada-güedé. ⁴ Te ío sàni iní-í naníhí tnáhá-ó cuèndá ío cudíí iní-í, chí ndàcu iní-í sá ïo ní ndáhyú-n sǎ ndihú iní-n cùtnáhá ní quide ndee iní-í tnáhá-ó. ⁵ Te nàha-í sá sàndáá ndisa iní-n Yá Ndiõxí dàtná ní ngúíta díhna-gá xǐtná-n tǎ Lòidá ndihí nǎná-n tǎ Eùnicé quidě-yu,

te cùtnuní ndáá iní-í sá díú tnàhá-n ïo váha sàndáá iní-n-gă.

6 Te xǎⁿ dándàcu iní ñàhà-í xii-n cuendá sá ïo-gá nducu ndèe-n cada-n chiuⁿ ní nduu táhú-n nǔú Yă Ndiǒxí cada-n, chi ní taxi-gá tnúhu ndee ìní ní ngúndecu ndìhi-n cǔtnàhá ní sacáⁿ ndodo-í ndaha-í díquí-n sǎ díú chiuⁿ-gá cada-n. 7 Te Espíritú sá nǐ taxi Yá Ndiǒxí ndécú ndìhi-o ñá túú cùu-xi ìⁿ Espíritú sá cádá nàcuáa yùhú-ó, chi cùu-xi ìⁿ Espíritú sá táxí tnúhu ndee ìní cada-o chiuⁿ-gá, te dǐu-xi quìde cuu iní tnàhá-ó ìⁿ ìⁿ-o, te dǐu-ni tucu-xi quìde cutnuní iní-ó nàcuáa cada-o cùndecu-o. 8 Te xǎⁿ nǔu vá cùcàhaⁿ núú-n cǎháⁿ váha-n cuendá Xítóhó Jesucristú, te ni vǎ cùcàhaⁿ núú-n sǎ dúhá yìhi-í vecaá sá cuendá-gá, te xini ñuhu-xi sá tnàhá-n ndòho-n sá cuendá tnúhu-gá, te cundee ìní-n ndòho-n, chi Yá Ndiǒxí chindee ñàha-gá xii-n. 9 Te Yá Ndiǒxí ní dácăcu nihnu ñaha-gă xii-o nǔú ùhú núú ndàhú, te ní cachí-gá sá cádá-ó nchàa nacuáa cùní méé-gă cunduu, te ducaⁿ nǐ quide-gá chi ducaⁿ nǐ sani iní méé-gă cunduu sá cádá vǎha ñaha-gă xii-o, te ñá díú sǎ ïo váha quìde-o ndecu-o ducaⁿ ni quide-gá. Te ndéé cǔtnàhá vátá ngǎva-gá ñuyíú nǐ cachí-gá sá cádá vǎha ñaha-gă xii nchaa nchoo ñăyiu ní ngúndecu ndìhi Xítóhó Jesucristú vitna. 10 Te vitna cùtnuní iní-ó sǎ ïo váha quìde ñaha-gá xii-o, chi ní quixi Xítóhó Jesucristú ñuyíú-a ní dácăcu nihnu ñaha-gă xii-o nǔú ùhú núú ndàhú, te Yaá-áⁿ nǐ quide-gá cuendá sá vǎ cùú-gá-ó cùú dúcáⁿ-ó, chi ní cachí-gá sá cùndècu-o ni caa ni quíhíⁿ te núu na quìndáá iní-ó tnúhu-gá.

¹¹ Te ní cachí-gá sá càháⁿ-í tnúhu-gá núú ñàyiú ñá túú cùú ñáyiú isràél te dacuàha váha-í-yu tnúhu-gá, te cuèi ndèni ní cuu ndècú-yu te quihíⁿ-í cáháⁿ-í tnúhu-gá núú-yu chi ducaⁿ ñí cachí-gá cunduu. ¹² Te cuèndá xíáⁿ nándi sá ndóhò-í vitna cuèndá-gá, dico ñá túú cùcahaⁿ núú-í chi cùtnuní váha iní-í nàcuáa sàni iní Xítohó Jesucrìstú Yaá sàndáa iní-í, te yúhú ní dáñà-í mée-í núú ndáhá-gã, te cùtnuní ndáa iní-í sá cótó ñàha-gá xii-í ndéé ná sàa nduu nàcuaca ñàha-gá.

¹³ Te vá dáñá ndéé-n càda-n nchaa nacuáa càháⁿ tnúhu váha ní dánèhé ñàhà-í xii-n, te ío quíndáa iní-n Yã Ndiõxí, te nchaa-o nàcuáa ndècu-o ndihí Xítohó Jesucrìstú ío cuu iní tnáhá-ó ìⁿ ìⁿ-o. ¹⁴ Te cada cuèndá váha-n sã vã dãma tnúhu Yá Ndiõxí sá ñí taxi-gá ndècú ndihí-n, te Espíritú-gá sá ñí taxi-gá ndècú ndihí-o chindee ñàha-xi xii-n.

¹⁵ Te yòhó sa xìní-n sã nchàa ñáyiú ndècu distritú Àsiá, ñáyiú ní sàndáa iní tnúhu Xítohó Jesucrìstú ní dáñá ñàhá-yu xii-í, te tnàhá té Fígeló ndihí té Hèrmógenés ní dáñá ñàha-güedé xii-í. ¹⁶ Te xicáⁿ táhù-í núú Xítohó Jesucrìstú sá ná chindee-gá cue ñáyiú cùú ndi mee té Onèsíforó, chi diu-dé ío vai xito ní quixi-dé ní quide cuèndá ñàhá-dě xii-í, te ní taxi-dé tnúhu ndee iní, te ñá túú ní cùcahaⁿ núú-dě sá yíhí-í vecaá. ¹⁷ Te cútnàhá ní xíndecu-dé ñuú Rómá ducaⁿ-ni ñí xóo nanducu ñàha-dé xii-í ndéé ndéé naníhí ñàhá-dě. ¹⁸ Te xicáⁿ táhú tùcu-í núú Xítohó Jesucrìstú sá ná cùndahú iní ñàhá-gã xii-dé nduu na sàa cundáa cuéchi nchaa ñáyiú. Te yòhó sa xìní ndáa-n sã ío ní chindee ñàha-dé xii-o cùtnàhá ní xíndecu-o ñuú Éfesú.

2

Tée quide ndáá xínú cuèchi núú Xítóhó Jesucrìstú

¹ Te yòhó tée cùu datná ìⁿ déhe mee-í ío nducu ndèe-n cada-n nacuáa níhí ndéé-gǎ-n cùndecu-n ichi Xítóhó Jesucrìstú chi òⁿ gá chindee ñàha-gá xii-n. ² Te nchaa tnúhu sá ñí dánèhé ñàhà-í xii-n ndìhì nchaa dava-gá ñáyíu, xǎⁿ danèhé-n dàva-gá cue tée quide ndáá cuèndá danèhé-güedé dava-gá ñáyíu.

³ Te cahni iní-n ndòho-n cunu cuechi-n núú Xítóhó Jesucrìstú dàtná cuìní-n ndòho ìⁿ sandadú sàhni iní-dé xínú cuèchi-dé. ⁴ Chi ní ìⁿ sandadú ñá túú nǎgá sání iní-dé cada-dé òré xínú cuèchi-dé cuèndá cudìu-dé núú tée tàxi tnuní ñàhá. ⁵ Te òⁿ ni ducaⁿ sǎtnahá-xi cùu tucu ìⁿ tée dàdìqui, chi núu vá dádiqui-dé nàcuáa tàú-xi cunduu te vá ñihí-dé sá ndúú tǎhú-dé. ⁶ Te núu ìⁿ tée xìnu cuechi ío nducu ndee-dé quidé chiⁿ-dé chíhí-dé tatá, te òⁿ-dé tàú-dé díhna-gá-dé níhí-dé sá cùhúⁿ yǎhu-dé. ⁷ Te cani iní-n nchàa tnúhu càháⁿ-í-a, te Xítóhó Jesucrìstú chindee ñàha-gá xii-n te tecú tnùnì-n nchàa.

⁸ Te ndacu iní-n sǎ Xítóhó Jesucrìstú ní cuu-gá ñanì tnáhá ndìi Dàvií, te ní xíhí-gá te ní ndoto-gá, te òⁿ ducaⁿ ndùu tnúhu dànehé-í ñáyíu. ⁹ Te ío dàndoho ñàha ñáyíu xii-í cuèndá sá càháⁿ-í tnúhu-gá, te quide ñàhá-yu xii-í dàtná quidě-yu ìⁿ tée ní quide ìⁿ cuèchi càhnu, chi ní chihi ñàhá-yu ve-caá xii-í, dico tnúhu Yá Ndiöxí chi vá ndácũ-yu nganí-yu. ¹⁰ Te xǎⁿ nùu cuèi nándì cùu nchaa sá quidé ñàhá-yu xii-í, dico quide cahnu iní-í cuèndá sá nánìhí tǎhú tnàhá nchaa dava-gá ñáyíu cuìní

Yă Ndiöxí cundecu ndihî-gá, chi nchaa ñáyiu na tnahá tnúhu ndihî Xítohó Jesucristú nduu táhŭ-yu cundecú-yu ndihî-gá núú ïo váha cãa ndecu-gá ni caa ni quíhîⁿ.

¹¹ Te xéhé cúú-xí ìⁿ tnúhu ndáá cuiti:
Nchoo cùu-o datná ñáyiu ní xíhî ndihî Xítohó Jesucristú chi ñá túú-gă ndécú-ó ìchi cuehé ìchi duha,
te xíăⁿ nŭu cuëi na sàá nduu cùú-ó ñùyíú-a, dico ðiu-ni cundecu-o ndihî-gá.

¹² Te núu na cùndee iní-ó ndòho-o nándi sá ndóhó-ó sã cuendá-gá, te sáá nduu te cunuu-o ndihî-gá.

Te núu na cãháⁿ-ó sã ñà túú xíní-ó-gă, te ðiu-ni ducaⁿ cŭñaha-gă xii-o sã ñà túú xíní ñáhá-gă ná sàá nduu cãda ndáá-gá cuéchi nchaa ñáyiu.

¹³ Te núu nchoo ñà túú quide ndáá-ó ndècu-o núú-gă ñá, dico mee-gă chi ío ndáá quidé-gă, chi Yă Ndiöxí nchaa sá sání iní-gá quidé-gă.

Tée quide nacúaa ndùu vétú iní Yă Ndiöxí

¹⁴ Te dandacu iní-n nchaa ñáyiu ndècu ndihî-o ìchi Xítohó Jesucristú nchaa tnúhu cãháⁿ-í-a, te cúñaha-n xí-yu sá Xítohó Jesucristú cuíní-gá sã ñà túú-gă nándi tnúhu cútnahá-yu, chi nchaa tnúhu cãháⁿ-yu-áⁿ dácúita nihnu-xi ñáyiu ndédóho ñaha xí-yu, chi ñá túú vèdana nàndíhî nchaa tnúhu-áⁿ.

¹⁵ Te ío nducu ndèe-n cada ndáá-n cùndecu-n núú Yă Ndiöxí, te cada-n chùⁿ-gă nácúaa nduu vétú iní-gá, te cãháⁿ ndáá-n tnúhu-gá, cuendá sã vã cúcãhaⁿ núú-n nŭú-gă. ¹⁶ Te vá cádá cuendá-n nchaa tnúhu sã ñà túú vèdana nàndíhî cãháⁿ ñáyiu

cuendá Yă Ndiöxí, chi nchaa ñáyiú càháⁿ tnúhu-án ndihí nchaa ñáyiú sàcúndedóho ñaha xìi-yu uuⁿ-gá quídě-yu nchaa sá cuèhé sá dúhá. ¹⁷ Te nchaa tnúhu-án cüténuu-xi dàtná quídé ìⁿ cuèhé sã ñãni ñaha xìi ñáyiú xìté nuu-xi nihíi yiqui cùñú-yu. Te tnàhá té Himènéú ndihí té Filetú càháⁿ-güedé tnúhu-án quídé-güedé dàtná quídé ñáyiú-án. ¹⁸ Te cue téé-án ñã túú-gã càháⁿ ndáá-güedé dàtná càháⁿ tnúhu Yă Ndiöxí, chi cächí-güedé sá ncháá nchòo ñáyiú ndècu ichi Yă Ndiöxí cúú-ó dàtná cue ñáyiú sa ní ndoto, dico na cùú ndisa-o te vã ndótó-gã-ó cächí-güedé. Te dava ñáyiú ní dáñã-yu sá sàndáá iní-yu tnúhu Yă Ndiöxí sá dúcáⁿ càháⁿ-güedé. ¹⁹ Te cuèi ducaⁿ quide davá-yu, dico Yă Ndiöxí ní taxi ndecu-gá cue ñáyiú ni yùhu ni iní ndécú ichi-gá, te cùtnuní sá ndécú ndihí ñaha-gá xií-yu, chi ìⁿ xichi núú tùtú-gá cächí-xi sá méé-gã xìní-gá cue ñáyiú cùu cuendá-gá. Te ìngá tucu xichi núú tùtú-gá cächí-xi sá ncháá ñáyiú sàndáá iní ñáhá xìi Xítóhó Jesucristú xíní ñùhu-xi sá vã cúndècu-gá-yu ichi cuèhé ichi duha.

²⁰ Te ñáyiú cuica chi ndècu ndihí-yu vehé-yu cóhó sã ñí cuáha mee-ni dǐhúⁿ cuááⁿ, ndihí cóhó sã ñí cuáha mee-ni dǐhúⁿ cuixíⁿ, te nchaa cóhó-ãⁿ cúú-xí dàtná cue ñáyiú ñã túú ñã cúmání núú Yă Ndiöxí. Te ndècu ndihí tucú-yu cóhó sã ñí cuáha mee-ni ñùhu, ndihí cóhó sã ñí cuáha mee-ni yùtnu, te nchaa cóhó-ãⁿ cúú-xí dàtná cue ñáyiú ñã túú quide ndáá núú Yă Ndiöxí. ²¹ Te nchaa ñáyiú ío ndècu yiñuhu núú Yă Ndiöxí cúú-yu ñáyiú ñã túú nihí tnáhá ndihí cue ñáyiú ñã túú quide ndáá núú-gã, te cue ñáyiú ndècu yiñuhu núú-gã-án ñã túú

tnàhí quée cáva-yu quidé-yu nchaa chiùⁿ tahu-gá.

²² Te ío cada cuendá-n vǎ cáda-n nàcuáa quide cue tée cuechi ndècu ichi cuehé ichi duha, te cada-n nàcuáa cundáá-n cundecu-n ichi Yá Ndiǒxí, te quindáá iní-n-gǎ, te cuu iní-n nchaa tnaha ñáyi-u-n, te cundecu nahi-n, chi ducaⁿ tàú-xi cada-n ndihí nchaa dava-gá ñáyi-u sa ní nduu ndoo ní nduu nine iní-xi ñáyi-u càháⁿ ndihí ñaha xì Yá Ndiǒxí.

²³ Te vǎ cáda cuendá-n nì ìⁿ tnúhu xǐtnàha ñáyi-u chi ñá túú vèdana nàndíhí-xi, chi núu na càda cuendá-ó te dìcò dánàá ñáhá-xí. ²⁴ Chi nchaa cue tée xínu cuechi núú Yá Ndiǒxí xíní ñùhu-xi càháⁿ váha-güedé ndihí nchaa ñáyi-u, te danèhé ñáhá váha-güedé tnúhu-gá, te cunduu càhnu iní-güedé te vǎ nàá-güedé. ²⁵ Te vii vii càháⁿ-güedé dóho nchaa ñáyi-u sàá iní-xi, ñáyi-u ñá túú tnàhá iní tnúhu ndáá tnúhu Yá Ndiǒxí, te ducaⁿ te cudana Yá Ndiǒxí cada-gá te ndixi túu iní-yu sá ñà túú quide váha-yu ndècú-yu te quindáá iní-yu tnúhu-gá. ²⁶ Te ducaⁿ te cutnùnì iní-yu sá sàcuíhná cúnù-xi taxi tnunì ñáhá-xí xì-yu, chi dàcahu iní ñáhá-xí xì-yu quidé-yu nchaa nàcuáa cùu iní-xi ni cùu.

3

Nàcuáa cada ñáyi-u òré sa ta cùyatni sáá nduu quìxi tucu Xítóhó Jesucrìstú

¹ Te càchí tnúhu-í xii-n cuendá cunaha-n nàcuáa cada-xi òré sa ta cùyatni sáá nduu quìxi tucu Xítóhó Jesucrìstú, chi dàvá-áⁿ ío cada úhú-xi. ² Chi ngüíta ñáyi-u cuhuⁿ iní-yu mee-ni sǎ cúú-xí mèe-yu, te cuhuⁿ iní-yu mee-ni díhúⁿ, te ío cada càhnú-yu mèe-yu, te cunduu yíchí iní-yu, te càháⁿ cuehé-yu cuendá Yá Ndiǒxí, te vǎ quindáá-gá iní-yu ni

tăță-yu ni nănă-yu, te ni vă ndàcáⁿ táhú nűú
 tnáhă-yu cuendá nchaa sá văha cada tnàhá-yu, te
 cadá-yu mee-ni sã ñà túú tnàhá iní Yă Ndiöxí.
³ Te vá cúú ìní tnáhá ndì meé-yu, te nàá-yu te vá
 cuánàá-yu, te tee tnàhá-yu cuéchi neñúú, te vá
 cuánàá-yu cadá-yu nchaa sá cuèhé sá dúhá sàni
 iní-yu, te ío cunduu cuihna ìní-yu, te vá tnàhá
 iní-yu nchaa sá văha. ⁴ Te dayuhu cuăha cuendá
 tnáhă-yu núú cuè téé cùchiuⁿ, te ío cunduu yî ìní-yu
 cadá-yu nándi sá ñà túú văha, te ío cada nínu-yu
 mèé-yu, te mee-ni nchàa sá cúdí^í ìní-yu cadá-yu, te
 vá cúdí^í ìní-yu nanducu ñìhnú-yu Yá Ndiöxí. ⁵ Te
 quesàhá-yu sá tnàhá-yu ndècú-yu ichi Yá Ndiöxí
 dico vá cadă-yu nchaa nàcuáa càháⁿ-gá.

Te yúhú càchí tnúhu-í xii-n sã vă ñihí tnáhá-n
 ndìhi nchaa ñáyiu ducaⁿ quìde. ⁶ Te dava ñáyiu-án
 quìhíⁿ-yu dava vehe núú xĩndecu ñáyiu, te
 ngũíta-yu dandàhú-yu ñáyiu ñìhí ñà túú xìní dana
 cuendá Yă Ndiöxí, te ñáyiu ñìhí-án cúú-yu ñáyiu
 ndècu vihi cuéchi-xi, chi ío cùdí^í ìní-yu quìdé-yu
 nchaa nání sá cuèhé sá dúhá sàni iní-yu. ⁷ Te cuèi ío
 dàcuahá-yu, dico ñà túú cùtnuní iní-yu nása cuáháⁿ
 tnúhu ndáá tnúhu Yá Ndiöxí. ⁸ Te ñáyiu ducaⁿ
 dandahú ñáhá xii cue ñáyiu ñìhí-án ñà túú càháⁿ
 váha-yu cuendá tnúhu Yá Ndiöxí, chi quìdé-yu
 dàtná ní quide ndí Jănés ndìhi ndí Jãmbrés chi
 cue ndí-án ñà túú ní cùu váha iní cue ndí núú
 ndí Moisés cuendá tnúhu ní càháⁿ ndí. Te ñáyiu-án
 cúú-yu ñáyiu sàni iní mee ñìne-ni nchaa sá cuèhé
 sá dúhá, te cuèi càchí-yu sá sàndáá iní-yu Yá Ndiöxí
 dico ñà ndàá sá sàndáá iní ñáhă-yu xii-gá. ⁹ Dico

vá ndácú-gă-yu dandàhú-yu vại ñáyiú, chi nchaa ñáyiú cutnùní iní-yu sá ïo ñi dĩquĩ-yu, te ñá túú cáháⁿ ndáá-yu dàtná ní quide cue téé úú ñá túú ní tnàhá iní tnúhu ní cáháⁿ ndíi Moisés.

Té Păblú dásàhú-dé té Timùteú

¹⁰ Te yòhó quidé-n nchàa nacuáa ní dánèhé ñáhà-í xii-n, te ní xiní-n nchàa nacuáa quide-í ndécù-í, te cùtnuní iní-n nàcuáa sàni iní-í ndécù-í ñuyiú-a, te xiní-n sã ïo sàndáá iní-í Yá Ndiòxí, te ïo cahnú iní-í, te cùu iní-í nchaa ñáyiú, te xiní tucu-n sã ïo quide cahnu iní-í cuěi nándi sá yăha-í ndécù-í dico ñá túú dàña ndeé-í ichi-gá. ¹¹ Te ïo vại sá quidé ñàha ñáyiú xii-í dándòho ñahá-yu sá ndécù-í ichi Xítóhó Jesucrìstú, te sa nàha tucu-n datná ní quide ñàhá-yu xii-í cùtnàhá ní xíndecu-í ñuú Antiòquiá, ndihí ñuú Ìconiú, ndihí ñuú Lìstrá, chi ïo ní dándóhó ñàhá-yu xii-í sá cuèndá-gá. Dico Xítóhó Jesucrìstú ïo ní xito ñaha-gă xii-í te ní chindee ñaha-gá cuěi nándi cùu sá ñi yăha-í. ¹² Te na cächí tnúhu ndáá-í xii-n sã ïo vại sá ñà túú văha cada ñaha ñáyiú xii nchaa ñáyiú cuení sá ñà túú nă cumání núú Yá Ndiòxí cuèndá sá ndécú ndihí-yu Xítóhó Jesucrìstú. ¹³ Dico dava ñáyiú cächí-yu sá cáháⁿ-yu tnúhu Yá Ndiòxí te ñá ndáá sá cáháⁿ-yu tnúhu-gá, ñáyiú-ánⁿ uuⁿ-gá cuita cada-gá-yu nchaa sá cuèhé sá dúhá quĩhíⁿ, te ducaⁿ-ni ïo dandàhú tnáhă-yu.

¹⁴ Te yòhó chi ïo váha ní sàndáá iní-n tnúhu Yá Ndiòxí sá dăcuàha-n, te vitna cáháⁿ-í dóho-n sã vă dáñá ndeé-n quíndáá iní-n tnúhu-ánⁿ, te yòhó sa nàha-n ná cúú ñáyiú ní dánèhé ñàhá xii-n tnúhu-gá. ¹⁵ Te yòhó chi ndeé cùtnàhá cúú làndú-n ñi ngũíta-n dăcuaha-n tnúhu ndeé núú tütú Yá

Ndiõxí, te ñi-ni nchaa tnúhu-gá canu ichi ñaha-xi xii-n te naníhí tãhú-n, chi sãndáá iní-n Xítóhó Jesucrístú. ¹⁶ Te nchaa cue téé ní tee tnúhu Yá Ndiõxí, chi ñi-ni mee-gã ní dácáhú iní ñáhá-gã xii-güedé nãcuáa tee-güedé, te tnúhu-gá ío váha dacuàha-o nchaa dava-gá ñáyiu, te càháⁿ-xi dóho-o sã vã cundècu-gá-ó ìchi cuehé ichi duha, te núu ñã túú quide ndáá-ó ndècu-o te nãcanu ichi ñaha-xi, te ñànehé ñáhá-xí nãcuáa cada-o cundáá-ó núú Yã Ndiõxí. ¹⁷ Te ñi-ni tnúhu-gá dátùha ñaha váha-xi xii nchoo cuè ñáyiu ndècu ndihí-gá cuendá cada-o nchaa núú sã váha.

4

¹ Te Xítóhó Jesucrístú quixi-gá taxi tnùnigá ñuyíu-a, te cada ndáá-gá cuéchi nchaa ñáyiu sa ní xíhí, ndihí cuéchi nchaa ñáyiu xíndecu vívú. Te mee-gã ndihí Yá Ndiõxí náhá-gã sá ïo càháⁿ-í dóho-n vitna ² sá ïo dacuàha-n ñáyiu tnúhu-gá, te vá dáñá ndéé-n dàcuahá-n-yu ndéda-ni càa oré cuéi ñã túú cuiní-yu cundedóho-yu, te nchaa ñáyiu ñã túú cuiní cada ndáá cúñaha ndáá-n nchaa nacuáa quidé-yu. Te cúñaha tùcu-n xii-yu sá vã dúcáⁿ-gã cadá-yu, te cáháⁿ-n dõho-yu cuendá cada ndáá-yu cundecú-yu. Te ío cunduu càhnu iní-n òré cáháⁿ-n dõho-yu, te ío dacuàhá-n-yu tnúhu-gá. ³ Chi sáá nduu te vá càchí-gá-yu cundedóho-yu nchaa tnúhu sá sánú ìchi ñaha cundecu váha-o núú Yã Ndiõxí, chi mee-ñã nchaa sá cúdí^í iní mée-yu cundedóho-yu, te ndúcú-yu cue téé ñànehé ñáhá xii-yu nchaa tnúhu cùu iní-yu-áⁿ. ⁴ Te vá cadá cuendá tnàhí-gá-yu tnúhu ndáá tnúhu Yá Ndiõxí, chi mee-ñã tnúhu sá ñã túú nãndíhi cada cuendá-yu. ⁵ Dico yòhó ío

quìhi iní-n cùndecu-n, te cahni iní-n cuèi nándi na ndòho-n, te dacuàha-ni-n ñáyiú tnúhu Yá Ndiõxí, ñáyiú vátá quìndáá iní ñáhá-gã xii-gá, te cada-ni-n nchàa chiuⁿ ní táhú-gã cada-n.

⁶ Te yúhú sa ñuhu ichi-ná-í quíhíⁿ-í núú ndécú Yá Ndiõxí cundecu-í, chi sa ní cuyatni cahni ñaha-güedě xii-í cuendá sá xínú cuèchi-í núú-gã.

⁷ Te ní quide-í nchaa chiúⁿ ní táhú Yá Ndiõxí cada-í te vitna ní xínu cava nchaa chiúⁿ ní táhú-gã-áⁿ ñi quide-í, te ñá túú ní dña ndeé-í ní sándáá iní-í-gá, te ducaⁿ-ni sándáá iní-í-gá ndeé vitna.

⁸ Te vitna sa ndècu túha-ná sá ndúú táhù-í cuendá sá quidé ndáá-í núú Yá Ndiõxí, te Xítóhó Jesu-crístú taxi-gá táhú-ãⁿ nduu táhù-í ná sáá nduu, chi cùu-gá ìⁿ Yaá quidé ndáá cuiti, te ñá díú-ní yúhú taxi-gá táhú-ãⁿ cuu cuendá-í, chi tnàhá nchaa ñáyiú ndètu cahnu-ná sáá nduu quìxi tucu-gá ñuyíú-a cuáñaha-gã táhú-ãⁿ nduu táhù-yu.

Chiúⁿ tahu té Pãblú cada té Timùteú

⁹ Te cuìní-í sá ìo ndìhi quixi-n quixi coto ñaha-n xii-í.

¹⁰ Chi té Dēmás ñá túú-gã quidé cuendá ñáhá-dě xii-í, chi mee-nã nchaa sá ìo ñuyíú-a ìo cùdíí ìní-dé. Te ní dándõo ñaha-dě cuáháⁿ-dé ñuú Tesalónica, te té Crèscénté cuáháⁿ-dé cundecu-dé distrítú Gálaciá, te té Títú cuáháⁿ-dé cundecu-dé distrítú Dalmaciá.

¹¹ Te ìⁿdìi-ná té Lùcá ndécú ndìhi ñaha-dé xii-í, te cúñaha-n xii té Mácú quixi-n ndìhi-dé, chi téé-áⁿ ndacu-dé cada-dé ìⁿ chiúⁿ-í.

¹² Te té Tiquicú ní tendaha-í-dé cuáháⁿ-dé ñuú Éfesú.

¹³ Te òré quixi-n te yáha-n vehe té Càrpú cáá ñuú Tròás canehe-n ìⁿ dóó tçachi ní dándõo-í vehe-dé quixi, ndìhi nchaa lìbrú-í, te tnàhá nchaa

dava-gá tutú-í ndécú vèhe-dé canehe-n quìxi chi xíáⁿ ío-gá xíní ñùhu-í. ¹⁴ Te té Lijandré té cùu rerú ío vài sá ñà túú vǎha ní cuu quide ñaha-dé xii-í, dico mee Yǎ Ndiǒxí náhá-gǎ nása cada ñaha-gǎ xii-dé cuendá sá dúcáⁿ quide-dé. ¹⁵ Te vá ñihí tnáhá-n ndìhi-dé chi ío càháⁿ cuèhé-dé cuendá nchaa tnúhu càháⁿ-ó.

¹⁶ Te cútnàhá ndécá ñàha-güedé xii-í ní sáháⁿ núu cuè téé cùchiuⁿ xito díhna nuu, chi mee dìi ní sáháⁿ te ñá túú ní sáháⁿ ni ìⁿ cue téé cùndìhi-í, chi nchaa-güedé ní dándõo ñaha-güedé xii-í, te yúhú xicáⁿ táhù-í núu Yǎ Ndiǒxí sá vǎ cadá cuendá-gá sá dúcáⁿ ñi quide-güedé. ¹⁷ Dico Xítóhó Jesucristú ní chindee ñàha-gá xii-í, chi ní taxi-gá tnúhu ndee ìní ní càháⁿ-í tnúhu-gá nàcuáa tàú-xi cunduu núu cuè téé-áⁿ ndìhi núu nchàa ñáyiu, dico ñá díú ñǎyiu israél cúu-yu, te ñiu-gá ní dácacu nihnu ñaha-gǎ xii-í ñá túú ní sàhni ñaha-güedé. ¹⁸ Te mee Xítóhó Jesucristú coto ñaha-gǎ xii-í te ñá túú ñǎ cuu cuèi nándi sá ná cadá ñàha ñáyiu xii-í te ñiu-ni-gá coto ñaha-gǎ xii-í ndéé ná sàá nduu sàá-í andiu núu ndécú-gǎ táxi tnùnì-gá. Te nchaa-o chí ná càchí-ó sǎ ío càhnu cuu-gá ñi caa ñi quíhíⁿ. Te ducaⁿ na cùnduu.

Tnúhu ndéé núu ñi ndìhi-ná

¹⁹ Te ío cúñaha-n na càda ndee ìní tá Priscá, ndìhi té Àquilú, ndìhi cue ñáyiu cùu ndi mee té Onèsiforó.

²⁰ Te té Èrastú ní quendóo-dé ñuú Còrintú, te té Trõfimú ní dándõo-í-dé ñuú Miletú chi cùhú-dé.

²¹ Te ío cundìhí ìní-n quixi-n oré vátá sàá-gá yóo quidé víxiⁿ-xi. Te ío cada ndee ìní-n càchí té Èúbulú, ndìhi té Pùdenté, ndìhi té Línú, ndìhi tá Clàudiá,

ndihì nchaa dava-gá ñáyi sàndáá iní tnúhu Xítóhó Jesucrìstú.

²² Te xìcáⁿ táhù-í núú Xítóhó Jesucrìstú sá ná cùndecu ndihì ñaha-gá xii-n ndìhì nchaa dava-gá-yu. Te ducaⁿ ò na chìndee chitúu ñaha-gă xii-ndo nchàa-ndo. Te ducaⁿ na cùnduu. Te ío chí cádá ndèe iní-nă vitna.

Tnúhu ní cáháⁿ yă ndiöxí xito cùu uú
New Testament in Mixtec, Peñoles (MX:mil:Mixtec,
Peñoles)

copyright © 2002 Wycliffe Bible Translators, Inc.

Language: Mixtec, Peñoles

Translation by: Wycliffe Bible Translators, Inc.

Mixteco, Peñoles [mil], Mexico

Copyright Information

© 2002, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, Peñoles

© 2002, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 3 Mar 2023 from source files
dated 29 Jan 2022

872f7754-0986-5ecd-a059-925a708a6939